

«Parmelin ha già ils pli paucs dischavantatgs»

Trais vuschs grischunas ed ils resultats da las reelecziuns

DA CLAUDIA CADRUVI / ANR

■ **I vala il secret d'elecziun. In parlamentari na sto betg dir a tgi ch'el dat sia vusch. Fin uss han ils Grischuns adina dà scleriment. Questa giada sa nuspeschan ins. Mo Stefan Engler mussa avertain sias simpatias.**

«Ins ha elegì quel ch'igl era da spitgar», di Engler (pcd). Il cusseglier dals chantuns è dentant stut da la gronda differenza tranter ils dus concurrents fermes: *Guy Parmelin* è vegnì elegì cun 138 vuschs, *Thomas Aeschi* ha fatg be 88 vuschs.

Simpatia per Norman Gobbi

Engler avess gugent vesì *Norman Gobbi* en il cussegl federal. Cun sia derivanza ord la Leventina avess el già chapientscha per ils basegns dals muntagnards. «Ma el ha già memia pauc sustegn dals agens», di Engler. «Uschia na funcziuni betg.» Ils parlamentararis d'in chantun stoppian far lobbying e star cun tutta forza davos lur candidat. Ch'ìls Tessinai han tralascià quai, explitgescha Engler cun la patria politica da Gobbi. «El ha stuì pajar il pretsch per il sa cuntegnair da sia partida en il Tessin.» La Lega haja onns or offendi bieras persunas.

Il di dad ier n'è tenor Engler betg stà in bun per las regions da muntogna. Cun *Eveline Widmer-Schlumpf* hajan ins pers influenza en il cussegl federal e cun *Corina Casanova* medemamain in access direct a l'administraziun. Ins stoppia uss s'adattar e far dapli per mantegnair bunas relaziuns cun la Romandia cun ses trais cussegliers federals. Il caracter dals «Welschs» correspundia gea bain a quel dals muntagnards.



Il nov cussegl federal cun las duas magistratas grischunas partentas ed il nov chanzelier.

KEYSTONE

Surpiglia Berset las finanzas?

«Jau vom da quell'anora che Parmelin daventa in bun cusseglier federal», di *Martin Schmid* (pld). El sez na l'enconuscha betg uschè bain, ma el spera che la pps haja preschentà candidats che chapeschian da s'integrar en in gremi. A tge candidat ch'el ha dà la vusch na vul il cusseglier dals chantuns betg tradir. Be tant: «Mia prognosa che Parmelin vegnia elegì è stada buna.» Ils ultims dis hajan ins senti en il discurs cun auters parlamentararis ch'ì vegnia ora uschia. «Parmelin ha

simplamain già ils pli paucs dischavantatgs.»

Sin la dumonda sche *Thomas Aeschi* haja stuì succumber pervi da sia vischinanza tar *Christoph Blocher* di Schmid che blers elements gioghian ina rolla: derivanza, vegliadetgna, scolaziun, clamada etc. Per l'ala sanestra saja la vischinanza tar *Blocher* segir stada in element. Damaun reparta il cussegl federal già ils departaments. Schmid suppona che *Alain Berset* midia en il departament da finanzas e che *Parmelin* artia il departament da intern.

Clausla stgandalusa

«Jau fiss stada bler pli cuntenta cun la reelecziun dad *Eveline Widmer-Schlumpf*», di *Silva Semadeni* (ps). I saja dentant dad acceptar l'elecziun. «Uss che la pps ha dus sezs sper jau ch'ella smetta da far opposiziun e da far iniziativa che mettan sut squitsch la Svizra.» La clausla d'exclusiun da la pps haja impedì ch'aueters candidats avessan pudì sa preschentar e che l'assemblea avess pudì tscherner ina persuna pli moderata.

Ils schefs da fracziun han criticà ier a moda veementa la clausla d'exclusiun e

prentedi da la pps da stritgar quella. *Roger Nordmann* (ps) ha discurrì d'ina «clausla stgandalusa e nundemocratica». Ella na correspundia betg al «spiert da nossa constituziun, ha ditg *Ignazio Cassis* (pld). La pps cuntrafetschia uschia al scumond d'instrucziun, ha ditg *Filippo Lombardi* (pcd). Ina tala clausla na sa cumportia betg cun ina partida che tegnia aut la libertad, ha ditg *Rosmarie Quadranti* (pbd).

Eleger da per sai ils cussegliers è unic

Avant che tscherner in nov cusseglier federal reelegia l'assemblea adina ils vegls. Quai porscha la chaschun d'exprimer malaveglia u simpatias. *Didier Burkhalter* è i quest'onn cun la plima. Il minister per l'exteriur ha fatg 217 vuschs. Era *Doris Leuthard* ha recaltgà in resultat excellent. L'assemblea ha reelegì la ministra da traffic ed ambient cun 215 vuschs. Il terzmeglier resultat ha obtegnì il minister per l'intern *Alain Berset* cun 210 vuschs.

Il minister d'economia *Johann Schneider-Ammann* ha fatg 191 vuschs. *Simonetta Sommaruga* ha survegnì 182 vuschs. Per ils dossiers difficils che la ministra da giustia ha da tgirar n'è quai gnanc uschè mal.

Ueli Maurer fatg 173 vuschs. Intgins parlamentararis avevan vuschà per *Thomas Hurter* empè per il minister da defensiun.

La Svizra saja il sulet parlament sin il mund ch'elegia da per sai mintga commember da la regenza, ha ditg *Christa Markwalder*, la presidenta dal cussegl naziunal. Quest sistem pretendia respect sur las partidas ora. Ella ha punctuà ch'ìls commembers da l'assemblea elegian senza instrucziun.